


			九	漢
		一	二	書
一	一	〇	〇	門
二	二	四	一	
冊	架	函	號	類

二				內
八		九		閣
函		〇		文
二	一	〇		庫
二	二	一		
架	冊	號	類	

內閣文庫			
番號	漢	9201	
冊數	12	(	6)
函號	286	186	



憲章類編卷之十五

翰林院

淺草文庫

洪武甲辰夏五月初置翰林院以陶安為學士時方召四方宿儒集闕下議禮制命安總之

洪武甲辰夏五月初置翰林院以陶安為學士時方召

洪武二年正月定翰林院官制以待讀學士朱升為學

士陳桎詹同為直學士三月乙未朔翰林學士朱

升以年老乞致仕許之上謂學士詹同曰古人為文

或以明道德或以通世務如典謨之言皆明白易知無  
深怪險僻之語至如諸葛亮出師表亦何嘗雕刻爲文  
而誠意溢出使人感激近世文士不究道德不達世務  
立辭艱深意實淺近即使過於相如楊雄何禪實用自  
今翰林爲文但取通道理明世務者無事浮藻 十一  
月上御外朝召翰林學士宋濂危素詹同王禕等列坐  
進饌賜酒上屢命盡觴濂數以弗能飲辭上笑曰卿但  
飲雖醉無傷也酒終上賦詩一章命各以詩進復命之  
酒霑醉而退

洪武三年七月翰林學士宋濂待制王禕失朝降爲編  
脩

洪武六年七月以宋濂爲翰林侍讀學士仍兼贊善

洪武七年五月賜翰林承旨詹同致仕同徽之新安人  
元舉茂才爲柳州學正遇亂家黃州陳友諒以爲翰林  
學士承旨及王師下武昌同見 上授國子博士歷遷  
學士承旨兼吏部尚書至是命致仕 六月復以詹同  
爲翰林學士罷兼吏部尚書

洪武八年三月以廣西按察司僉事答祿與權爲翰林

備撰 十一月 上欲命宋濂叅中書大政濂辭曰臣  
無他長唯文學是攻今待罪禁林恩莫大矣臣誠不願  
居要樞上愈厚之每日令侍膳詢訪舊章講求治道  
洪武九年五月復命宋濂爲學士承旨知制誥如故六  
月時宋濂爲翰林學士承旨有寧海方孝孺從游濂大  
竒之

洪武九年十一月宋濂致仕先是 上以濂艱於行步  
特詔皇太子選良馬以賜上親作良馬歌命羣臣咸和  
以寵耀之及詔致仕加贈濂父文昭爲禮部尚書祖德  
政爲太常寺少卿二代誥詞皆上所親製天下榮之

十二月 頒建言格式時刑部主事茹泰素上書論時  
務五事累萬餘言 上令中書郎中王敏誦而聽之虛  
文多而實事少次夕又於宮中誦之再三審其切要可  
行者四事纔五百餘言因慨然曰朕所以求直言者欲  
其切于事情而有益於天下國家彼浮詞者徒亂聽耳  
遂令中書行其言之善者具爲定式頒示中外使言者  
無事繁文 宋濂行既有期 上眷念尤深曰卿去何  
時復來見朕乎姑徐徐行由是朝夕左右者累日時詔

許言事朝臣有上疏萬餘言者上厭其迂衍怒欲罪之以問羣臣有阿意者指其疏曰此不敬此詆謗罪當誅上答之而怒未解濂曰彼應詔上疏其心為上耳烏可深罪乎已而上覽疏中有足采者召阿意者詬曰吾怒時若等不能諫乃激吾誅之何異以膏沃火何非宋景濂之言不幾誤罪言者耶

洪武十年春正月庚辰朔 宋濂以學士承旨致仕

上命舉可以自代者濂以蘇伯衡對先是伯衡嘗為翰林編脩以耳聵辭至是召至復固辭上亦憫其誠特賜

文綺遣之 二月宋濂辭歸瀕行賜楮幣文綺及御製

文集皇太子又賜衣二襲 上諭曰朕最慎于賞嘉卿

忠誠故以賜卿卿今年幾何濂曰六十有八上曰藏此

綺俟三十二年後作百歲衣也濂頓首謝上復屬曰大

江漲不可行宜循內河至家仍命使護行濂感恩請歲

一來朝 宋濂抵家上表謝 九月宋濂來朝越十有

四日見于端門 上見大喜皇太子諸王皆喜上遣儀

曹備膳羞諸物抵寓館以賜自是日侍上游恩禮備至

十一月宋濂在朝七旬餘以歲暮辭還 上曰方今

四夷皆知卿名卿其自愛濂謝不敢當復遣中貴人賜上尊道所經行皆為指畫既行數日上謂其子宋璲曰朕疇昔之夜夢見爾父爾父雖去其容儀儼然在朕目中璲叩頭謝

洪武十一年十二月致仕宋濂來朝賜勅勞之

洪武十二年十月以儒士吳沉為翰林院待制十二月致仕宋濂來朝上曰卿多積德以致高壽雖致仕而戀闕甚切不憚祁寒每歲斯時來朝特賜酒殽及日用之物卿其頌之

洪武十三年夏四月降翰林院待制吳沉為編脩賜翰林院編脩張美和應奉陳溥致仕各御製詩文賜之洪武十四年五月召山西右布政趙新為翰林院脩撰十二月令翰林院平駁諸司奏啓

洪武十五年冬十月丙子朔朝罷召侍從儒臣訪論古道嘉吳沉德業文學之美命善工繪其像賜之以示褒寵

洪武二十年十一月以河南府儒學訓導葛鈞為翰林侍講學士

洪武二十三年十一月庚戌以重慶府永川知縣王佐爲翰林侍讀

洪武二十五年十二月免翰林學士劉三吾官時三吾詣吏部自陳壻戶部尚書趙勉夫婦坐法當死皆緣素失教誨自當引退以勵廉恥吏部以聞遂免其官

洪武二十六年九月復以劉三吾爲翰林學士

洪武三十年正月陞翰林脩撰張信爲侍讀編脩戴彝爲侍講上諭之曰官翰林者雖以論思爲職然旣列近侍旦夕在朕左右凡國家政治得失生民利病當知無不言昔唐陸贄崔羣李絳之徒在翰林皆能正言讜論補益當時顯聞後世爾等當以古人自期毋負朕擢用之意

洪武三十一年七月建文帝召漢中府學教授方孝孺爲翰林院侍講

十二月建文帝召宋懌還京師懌故翰林學士濂之孫濂嘗授先懿文太子經帝念之召懌復官翰林侍書

革除建文元年五月以王叔英爲翰林脩撰六月召解縉于河州以爲翰林待詔十二月以葉砥爲翰林

編脩

革除建文三年十二月吏部試翰林史官楊士奇等以次錄用復留士奇於翰林

成祖革除建文四年七月罷學士董倫以王景為翰林學士

成祖革除建文四年十一月以解縉為侍讀學士胡靖黃淮胡儼並為侍讀楊榮楊士奇金幼孜並為侍講

永樂二年三月陞翰林院編脩王達為侍讀學士

永樂三年四月詔以儒士馬巨江為翰林博士戶江以老固辭遂授博士賜璽書褒諭令致仕

永樂四年閏七月召北京儒士武周文至命為翰林侍講學士以其老賜勅致仕

永樂五年二月黜翰林學士解縉為廣西右叅議

永樂六年七月翰林院學士王景卒景在洪武中歷教諭知州陞山西叅政坐事謫雲南建文中吏部尚書張

統前任雲南雅知之奏陞翰林侍講上即位陞學士時建文君未葬上詢葬禮景對宜葬以天子之禮

永樂十四年四月命楊榮金幼孜為翰林學士十二



月陞翰林院脩撰沈度為侍讀學士

永樂十五年六月以儒士郭張善為翰林院檢討

永樂二十二年八月仁宗以洗馬楊溥為翰林院學士

正字金問為翰林院脩撰

仁宗九月陞翰林侍讀王直為侍讀學士侍講王英為

侍講學士脩撰林誌檢討錢習禮為侍讀檢討余學夔

五經博士王達為侍講

永樂二十二年九月仁宗陞翰林脩撰陳循為侍講

宣德七年八月以京官三品以上所薦福建建安縣學

教諭楊壽夫山東臨清縣學教諭彭琉為翰林編脩

宣德九年十月翰林學士沈度卒度松江華亭人初以

善書被薦入翰林累進翰林學士貞靜不苟初入翰林

鄉人李至剛為禮部尚書得君氣勢赫赫希附者日奔

走其門度未嘗造謁閉戶鳴琴賦詩以自樂云

正統三年四月進錢習禮翰林學士劉球翰林侍講

正統八年六月翰林侍講劉球下獄為錦衣衛指揮馬

順所殺時球上疏忤中官王振振令順盜殺之

正統九年二月陞曹鼐為翰林學士

景泰元年二月侍講劉定之抗疏言人主當總攬乾綱親決政務凡政事有早朝未及決者宜日御便殿近臣侍于側大臣奏于前言官察其邪正而加糾彈史官書其言動以示懲勸君臣之間詢謀可否以求至當此前代故事祖宗成法也遵而行之則剖決萬幾日益以熟審察百官日益以明聖政益新天命益隆矣若乃仍如前日無事但以奏本進入擬旨批出臣恐偏聽生奸獨任成亂治化無由成也疏入不省

景泰三年三月彭時復為翰林侍讀

天順二年正月內閣李賢嘗謂翰林實文學侍從之臣非雜流可與景泰間陳循輩各舉所私非進士出身者十將四五率皆委靡浮薄之流一時無由而退至是上欲重脩通志唯推擇進士出身者此輩遂知不當居此願補外職賢乃言於上命吏部外除之翰林為之一清按永樂宣德以前翰林不拘進士出身方孝孺楊士奇胡儼輩非進士而文學擅一時至李賢乃有此論豈非時世之一變耶自後特重進士科而翰林非一甲進士及庶吉士不預內閣非由翰林不入迨黃緣阿附以

希進者則反不拘此格遂與祖宗時大異矣

天順八年正月憲宗下侍讀學士錢溥獄謫廣東順德縣知縣出兵部侍郎韓雍為浙江叅政溥松江華亭人正統時進士浮躁嗜進時太監王振訪可教內侍書者或薦溥試薔薇露詩大加稱賞特受檢討累遷侍讀學士溥所教內侍後多用事溥之居與陳文隣內侍每來謁溥必邀文共飲及英廟大漸太監王倫者嘗受業尋伴讀東宮至是來謁溥文意必召已竟不召乃使人密伺之倫言上不豫東宮納妃如何溥言當以遺詔行事已而內閣草遺詔李賢當秉筆文起奪其筆曰無庸已有草之者矣遂言溥倫定計將退賢以溥代之退兵部尚書馬昂以韓雍代之賢怒以聞乃下溥獄謫外韓雍亦貶

天順八年三月憲宗復前脩撰岳正官至成化五年閏二月以興化知府致仕五年卒

成化七年九月巡視四川南京戶部右侍郎黃琛言故翰林學士承旨宋濂我太祖高皇帝龍飛初召置左右裨益良多一應制度文章多出濂手開國文臣濂誠第

一既老被累謫死於蜀非其罪也蜀獻王已為葬之華陽縣東臣惟聖朝凡羣臣之有才行勲業沒皆賜以贈謚在前代者亦為之建葺祠墓復其子孫皆最盛德事臣敢為濂請上下其章于禮部

成化十年十二月陞翰林編脩程敏政為侍講陞翰林編脩李東陽為侍講

成化十一年九月陞翰林編脩倪岳為侍讀

成化十二年二月陞翰林編脩陳音為侍讀

成化十六年秋七月翰林侍講彭教卒教江西吉水人

甲申進士第一授翰林脩撰進侍講卒年四十二教性刻厲尚氣不肯下人儕輩多忤因鬱鬱成疾遂不起

成化二十二年五月翰林侍講尹龍除名并革其父旻太子少保以尚書致仕時東廠官校發龍諸陰事下錦衣獄既而吏科給事張雄等言龍竊弄父權納賄如市知縣孫盛送銀三百特授知州指揮吳昂送銀五百兼管糧運尹旻縱子受賕欺公罔上罪惡貫盈人心憤怨御史陳孜等亦言尹旻賄賂公行苞苴競進通判王範濫陞主事經歷張璩驟進少卿子龍素無學問之功父

著貪污之跡夫是父也龍子也子之惡是且不知何以別天下之賢否使其知則於家且不齊何以典人物之銓衡事既敗露復何面目立於清班乞特奮乾剛大彰天討以爲父子同惡人臣倖進之戒上命三法司錦衣衛執尹龍張璠王範于午門前拷訊明白革是太子少保令致仕龍等發原籍爲民

成化二十二年七月降翰林侍講學士焦芳爲湖廣桂楊州同知先是芳與尹龍爲同官甚密會兵部郎中鄒襲坐罪龍囑軍官奏保復職芳爲草奏尋爲東廠緝知以聞下錦衣衛獄降調外任

弘治十三年四月以張元禎爲翰林學士

弘治十七年夏四月授庶吉士何瑋爲翰林編脩

正德元年六月以孔彥繩爲翰林五經博士

正德三年十月翰林學士張芮見劉瑾長揖不拜遂坐事調爲鎮江府同知

正德五年三月脩撰何瑋以長揖忤劉瑾乞致仕歸

正德六年二月召編脩何瑋復任

按高廟初定東南首召陶安爲學士制度儀章悉安所

議嗣是朱升詹同宋濂魏觀劉三吾葛鈞皆有籍焉洪武初典禮肇脩局且廢制誥記史藝翰有國之首務乃立諸員而總以學士為提綱學士文學之成者以之侍其讀侍其講以親其所御其考經執籍執書應詔使以供其所役編焉撰焉檢覈焉以紀其所行此建置之周也中間謂其繁而革之亦各有指殿閣之沿於古卽承旨學士直學士之職也待制應奉卽知制誥之事也檢閱卽檢討之官也秘書監卽典籍之司也起居注卽史官之業也弘文館卽五經博士之屬也蓋廢置有因與司無缺而設立甚明其後不就列陳力典密非奉直原司制誥非承旨舊意脩書非史官故業撰著非學士本色多有非昔之舊者

吳元年置翰林國史院正三品設學士承旨學士侍講學士侍讀學士直學士典籍待制脩撰應奉編脩典籍檢閱尋改翰林院洪武十四年改正五品革承旨直學士待制應奉檢閱典籍設孔目五經博士侍書待詔檢討是年十二月令翰林編脩檢討典籍春坊司直卽正字贊讀考駁諸司奏啓平允則列名封上署曰翰林院

兼平駁諸司文章某官某十八年定設學士侍讀學士侍講學士爲正官孔目首領官侍讀侍講五經博士典籍侍書侍詔屬官脩撰編脩檢討史官又有秘書監弘文館及起居注等官未幾皆革建文中增學士承旨一人學士一人文學博士二人省侍講侍讀學士置文翰文史二館文翰館設侍書文史館設脩撰編脩檢討靖難後復故今學士一人侍讀學士二人侍講學士二人其屬侍讀二人侍講二人五經博士五人典籍二人侍書二人侍詔六人孔目一人史官脩撰三人編脩四人檢討四人史一人學士掌詞翰禮文章誥勅備顧問詳正圖書考議制度凡經筵日講脩書之事皆統領之侍講侍讀職掌講讀經史五經博士專講經義以佐學士典籍勾輯國書以時什襲而藏之侍書以字書侍上待詔應對孔目典文移出入史官掌脩國史凡天文地理宗潢禮樂兵刑諸大政上所下詔勅書檄批答王言皆謹籍而記之以備實錄凡學士講讀史官爲上所簡注皆得入內閣預機務京府鄉試充考試官禮部會試充同考試官詹事府坊局亦如此之

國史實錄

洪武二年六月詔宋濂為翰林學士王禕同知制誥兼國史編脩總脩元史時編摩之士皆山林布衣發凡舉例皆濂禕主之

洪武五年十二月禮部尚書陶凱言漢唐宋皆有會要紀載時政以資稽考今起居注紀言紀事及奏事簿籍紀載時政可以法當時訓後世者宜依會要編類成書使議事者有所稽考從之

洪武六年九月詹同等請編日曆

上命宋濂樂韶鳳為纂脩官凡興王出治之典命將行師之績采章文物之懿律曆刑法之詳咸以事繫日以日繫月以月繫年必商確而謹書之

洪武七年五月纂脩大明日曆成自上起兵臨濠踐天位以至六年癸丑冬十二月凡征伐次第禮樂沿革刑政施設羣臣功過四夷朝貢之類莫不具載合一百卷詹同宋濂率諸儒上進命藏之金匱其副藏於秘書監濂等又言于上曰日曆藏之天府人欲見之有不可



得臣請如唐太宗貞觀政要分類更輯聖政爲書以傳於天下後世上從之於是分爲四十類自敬天至制蠻夷釐爲五卷總四萬五千五百餘言名曰皇明寶訓自是以後凡有聖政史官日紀錄之隨類增入宋濂序曰史書甚重古稱直筆不濫美不隱惡務合乎天理人心之公無其事而曲書之者固非也有其事而失書者尤非也况英明之主不世出而記注之官遷易不常無以究夫聖德之高深臣詹同暨濂幸獲日侍燕閑十有餘年知之深故察之精察之精則其書也頗謂得其實而無愧茲因日曆成書謹揭其大要於首簡使他日脩實錄者有所採掇庶幾傳信於千萬世也

革除建文元年正月勅脩 太祖高皇帝實錄禮部左侍郎兼翰林學士董倫右侍郎兼翰林學士王景彰爲總裁官太常少卿廖昇翰林侍講學士高巽志爲副總裁官國子博士王紳漢中府學教授胡子昭齊府審理副楊士奇崇仁縣學訓導羅恢馬龍他郎甸長官司吏目程本立等爲纂脩官

革除建文三年十二月太祖高皇帝實錄成

革除建文四年十二月成祖命重脩太祖高皇帝實錄  
永樂元年六月解縉等上表進 高皇帝實錄

永樂九年冬十月 命重脩 太祖高皇帝實錄姚廣  
孝夏原吉為監脩官胡儼黃淮楊榮為總裁官楊士奇  
金幼孜等為纂脩官皆賜勅勉勵

永樂十六年五月夏原吉等上表進高皇帝實錄 上  
具皮弁服御奉天殿受之賜夏原吉胡廣楊榮胡儼金  
幼孜曾榮鄒緝王英余昂羅汝敬李時勉陳敬宗等鈔  
錠綵幣有差

十八人入奏上命少傅楊士奇楊榮出題試于廷中擇  
其優者知縣孔友諒進士胡端禎廖莊宋璉教諭黃純  
徐惟超訓導婁昇七人以聞令吏部改進士為庶吉士  
與知縣教諭俱歷事六科以備用

編纂系館

成化九年十一月大學士彭時因奏翰林春坊等官劉  
珣王獻彭華楊守陳尹直黎淳謝一夔鄭環劉健汪諧  
羅璟程敏政陸簡林瀚分為七館編纂明年立睿丁憂

起復令同編纂再加一館爲八館云

# 史館

弘治十八年十二月武宗翰林編脩何瑋上疏臣以菲薄待罪史官伏觀內外百司各有職守而史官獨若無所事者朝參之餘退安私室於國家政務無分毫補益猶且月受俸錢日支廩給既失官守之職難逃尸素之譏每念及茲不勝惶愧臣謹考古者王朝列國皆有史官掌記時事我祖宗設脩撰編脩檢討謂之史臣俾司紀錄法古意也謹按太祖時劉基條答天象之問

上悉以付史館在太宗時王直以右春坊右庶子兼記註凡聖政聖訓之當書者皆錄之以備纂述由是推之史官之職在國初猶未失也不知因循廢墜始於何時沿襲至今未克脩舉方今山陵既畢政治維新伏望遵祖宗所已行脩史職於久廢勅令脩撰編脩檢討番直史館凡陛下之起居臣工之論列大政事之因革弛張大臣僚之陞降拜罷皆令即時紀錄止用據事直書不須立論褒貶仍於紙尾書某官某人記藏之匱櫝以待

纂述史職既脩國典斯備上則聖君賢臣嘉謨嘉猷不至有所遺落下則儉夫小人懼遺萬世之譏亦有所懲戒不敢縱恣為惡公則明朝廷無虛設之官私則使人臣免素餐之愧事體甚便或謂館閣之地所以儲養異才不必責以職守臣竊謂養才之道當使之周知天下之務方可以備他日之用今諸人於國家政事初不聞知雖欲練習其道無由若令史館供職庶因紀錄之間得練習政事之體他日任用不至踈脫是於脩職之中實寓養才之意上命所司知之

按本朝脩撰編脩檢討特有史官名耳實錄進呈焚草液池一字不傳况中間類多細事重大政體進退人材多不錄每科京師鄉試考官賜宴皆書冢宰內閣大臣其先後相繼竟不可考他可知已

## 翰林四諫

成化四年春正月改湖廣臨武知縣章懋為南京大理左評事湘潭知縣黃仲昭為右評事桂陽判官莊景為南京行人司副時六科給事中毛弘等上言元宵張

憲章 卷之五  
燈誠 皇上奉兩宮之孝心章懋等輒肆已見過為言  
論亦竊效因事納諫之意蓋以天下災荒其虜窺伺兩  
廣徭徭未寧四川苗蠻為梗無非欲皇上常存敬畏制  
治保邦耳古人有言曰君明臣直今懋等敢言直諫實  
由 皇上聖明有以致之既不容納其言而又改調外  
任恐遠近流傳其於從諫之美不無少妨也伏望將懋  
等從宜處之豈惟慰人心息物議而於國家大體亦未  
必無少補矣章上遂俱改調南京時羅倫已復南翰脩  
撰人稱為翰林四諫

### 翰林改部屬官

正德三年三月 改翰林院編脩顧清等為部屬官先  
是焦芳子焦黃中會試中式芳意欲為殿魁既而取呂  
柟為第一黃中居二甲首芳謂諸執事抑之遂入言于  
劉瑾改清等官授黃中檢討及劉宇之子劉仁等六七  
人俱為庶吉士數月黃中與仁等皆擢編脩

正德四年五月 改翰林侍讀徐穆編脩汪俊等為南  
京部屬先是劉瑾惡諸翰林不行跪禮及脩孝廟實錄

成例進秩瑾謂文士不習世故擿所忌者十餘人陞調南京員外郎主事等官俾擴文政務

## 九卿巡撫

永樂十九年四月勅吏部尚書蹇義等二十六人巡行天下安撫軍民

宣德三年五月巡撫蘇松等處大理寺卿胡禎奏浙江嘉湖杭三府人民蕃多稅糧浩大府縣有治農官理辦稅糧宜增布政司官一員以總之上謂吏部曰稅糧

自是常賦國初以來徵歛輸送已有定制朕方裁抑冗濫豈得復設古語省事不如省官所奏不允

宣德五年九月陞吏部郎中趙新為吏部右侍郎兵部郎中趙倫為戶部左侍郎禮部員外郎吳政為禮部右侍郎監察御史于謙為兵部右侍郎刑部員外郎曹弘為刑部右侍郎越府長史周忱為工部右侍郎巡撫各省兩畿總督稅糧新江西倫浙江政湖廣謙河南山西弘北直隸府州縣及山東忱南直隸蘇松等府縣宣德十年九月以徐禧為兵部右侍郎巡撫甘肅

正統十年十二月刑部侍郎薛希璉巡撫保定淮安十  
二郡

正統十三年五月以刑部侍郎薛希璉巡撫福建提督  
軍務

六月以侍郎楊寧巡撫江西

正統十四年十月改戶部尚書周忱為工部尚書仍巡  
撫南直隸

景泰二年八月巡撫南直隸工部尚書周忱乞致仕命  
戶部侍郎李敏代之

### 九卿總督糧餉

革除建文四年五月勅刑部尚書侯大轉餉淮安

天順四年三月召耿九疇為南京刑部尚書總理南京  
糧儲

成化元年正月命戶部右侍郎薛遠整飭兩廣軍餉

### 部卿叅贊軍務

革除建文二年十二月以鐵鉉為兵部尚書仍叅贊軍

務

宣德二年十月勅工部尚書黃福同交趾布政使阮勛  
曰爾福爾勛皆先朝老成今交趾未靖發兵征討特令  
卿二人叅總機務其同心協力早成平定之功用安一  
方之衆事有當陳奏者密封以聞

宣德十年六月命南京戶部尚書黃福叅替南京軍務  
時楊士奇言上初嗣位當肅軍政飭邊防南京根本重  
地雖有襄城伯李隆守備宜令黃福叅替遂永為定制  
正統元年三月命兵部左侍郎柴車叅替陝西軍務

正統九年五月以刑部侍郎楊寧叅替雲南軍務  
正統十一年十二月召楊寧還以侍郎侯璉叅替雲南  
軍務

景泰元年三月以孫原貞為兵部右侍郎叅替浙江軍  
務

部卿經理屯田

宣德五年八月命尚書黃福經理屯田於濟寧以北衛  
輝真定以南近河之地役軍民十萬人屯種



宣德六年五月遣兵部侍郎柴車往山東經理屯田時  
巡按御史張勗言大同地平曠所種粟麥有收多為軍  
官據占小民日困乞遣官按視屯耕者分與軍民為便  
上命車及御史一人往理之

宣德八年正月勅巡撫侍郎周忱總督南京各衛所屯  
田

### 部卿總理河道

永樂九年二月命工部尚書宋禮侍郎金純同都督周

長發山東及徐州等處民丁開濬會通河仍命兩御史

監督三月命工部侍郎蔣廷璿開濬河南黃河故道

正統十二年七月河決張秋潰沙灣入海尋決滎澤入

淮工部尚書石璞治之

成化七年十月調南京刑部左侍郎王恕為刑部左侍

郎奉勅總理河道

### 部卿巡視

洪武三十五年七月成祖命工部尚書嚴震直等巡視

河北諸省

正統元年十二月命兵部尚書王驥巡視陝西諸邊整飭軍務許以便宜行事

部 卿 捕 蝗

正統元年四月河北旱蝗遣工部侍郎邵旻等分道督捕

部 卿 問 災

正統四年六月京師大水勅戶部侍郎吳璽存問被災軍民具奏賑卹

景泰七年正月順天河間二府民饑命刑部右侍郎周瑄往賑之

部 卿 鎮 守

正統十三年九月以侍郎孫原貞鎮守浙江

正統十四年十月尚書石璞鎮守宣府

景泰二年九月以孫原貞為兵部尚書鎮守浙江福建

# 採訪使巡行

革除建文元年三月戶部右侍郎夏原吉都御史暴昭給事中徐思勉等二十四人充採訪使巡行天下問民疾苦興廉黜貪得便宜行事

皇明憲章類編卷之十五終

皇明憲章類編卷之十六

# 吏部

洪武元年十月以汪河為吏部侍郎河初為大都督府都事癸卯歲奉使擴廓帖木兒被拘陝右六年至是始還故有是擢

洪武四年五月以李守道詹同為吏部尚書

洪武十一年三月上謂吏部臣曰朝廷懸爵祿以待天下之士資格者為常流設耳若有賢才豈拘常例今

後庶官之有才能而居下位者當不次用之

洪武十三年正月召山西布政司左叅政僕斯為吏部尚書

洪武二十九年正月以杜澤為吏部尚書

洪武三十一年三月上諭吏部臣曰用人之道在於隨材任使則天下無棄人矣又曰觀人之法有數等才德俱優者上也才不及德者其次也才有餘而德不足又其次也苟二者俱無此不足論矣若逐勢變移好作威福言是而行非此小人不可用也

洪武三十一年六月議革冗員以中書舍人蹇義

為吏部右侍郎十二月以雲南左布政使

張統為吏部尚書

革除建文元年十二月以練子寧為吏部左侍郎

革除建文二年二月令蘇松江浙人得官戶部

革除建文三年十二月起復陳洽為文選郎中

革除建文四年八月

成祖以蹇義為吏部尚書

永樂二年四月吏部尚書蹇義奏請選官上諭之曰

爾等職專銓選但當揆理不當任情揆理則以是非為進退任情則以從違為取舍慎之慎之又曰用人之道各隨所長才優者使治事德厚者令牧民蓋有才者未必皆君子有德者必不為小人不可不察

宣德元年四月吏部尚書 蹇義等奏請選官 上諭

之曰庶官賢否關國家之治亂掌銓衡者以進賢退不肖為職一事得人則一事理一邑得人則一邑安推之庶政達之天下無二致也朕嗣承祖宗大統維新治理以安民生選賢任能尤為切要古人取士於鄉以其道於上曰勲廉謹老成雖老精力未衰乃晉之

天順二年四月吏部左侍郎孫弘聞喪 上召李賢曰孫弘豈勝吏部賢曰誠如聖諭蓋弘先以知縣考滿赴京為石亨鄉里囑留京官又因奉迎有功陞工部侍郎復極力謀求得此士林鄙之上又恐其謀奪情即令守制復召賢曰吏部乃天下人物權衡侍郎即尚書之次非他部比必得其人卿以為誰可賢曰無如鄒幹姚夔上復問其優劣賢曰幹端謹但規模稍狹夔表裏相稱有大臣之量上曰然以姚夔為吏部侍郎

天順三年九月謫吏部侍郎孫弘為大理通判

天順四年閏十一月召巡撫南直隸右副都御史崔恭為吏部右侍郎恭廣宗人剛廉有為嘗知萊州府值歲旱蝗恭親督捕發郡縣倉勸富民粟賑之民賴以全活  
在萊六年屢辨冤獄遷湖廣右布政使威惠大行巡撫蘇松時有清軍御史郭觀持法過刻崑山縣有一人涉誣連逮充軍者至二十四人欲訴冤於恭或謂巡撫與御史各領勅行事訴之無益或謂在京刑部都察院獄情必大理寺評允無礙方敢決斷御史在外行事刑獄苟有寬抑伸理平反非巡撫而誰於是往訴於恭果為平反二十四人皆復為民先是有提學歐御史校士不公被黜者相率訴于前巡撫李秉不為理恭繼至諸生復往訴恭一一親試之移文提學覆試仍送入學不數年有中鄉試者有登進士者南畿巡撫自周忱之後恭為特著云

天順六年九月少傅吏部尚書致仕王直卒年八十四贈太保謚文端直在翰林侍從三十餘年為冢宰十六年躋三孤登一品八十致仕

天順七年二月以尹旻為吏部右侍郎

成化元年三月加吏部尚書王翱太子太保

成化三年七月吏部尚書王翱寢疾乞致仕從之時翱

年八十有四十一月致仕少保吏部尚書王翱卒贈

太保謚忠肅翱直隸鹽山人永樂乙未進士清心寡慾

方嚴質直循守禮法不尚文藝久在邊方一惟鎮靜及

典銓衡門無私謁明於知人進賢唯恐不及歷仕五十

三年第宅服食不改於舊沒後家無餘貲人謂其清自

之節雖古名臣何以加焉以都察院左都御史李秉

為吏部尚書

成化五年正月刑科給事中蕭彥莊劾奏吏部尚書李

秉任情行私其大罪十有三且言其暗結年深御史附

已專權上命三法司會多官議聞於是尚書陸瑜會

六部衙門議秉銜直沽名顛倒選法詔曰秉有負任使

革太子少保令致仕其所言暗結年深御史仍命彥莊

指實回奏時大理寺卿王槩彥莊姻家欲謀逐秉而代

之是奏槩所授也彥莊既被旨詰秉所結年深御史乃

以劉璧吳遠馮徽對蓋以璧等嘗建言推舉官當悉歸

吏部遂俱下錦衣衛獄彦莊所劾退丘陵孫遇李齡亦多誣枉陵累懇辭不已乃命會官并彦莊廷鞫彦莊坐奏事不實降四川永寧驛丞至永寧未幾署大寧縣事以科罰過重為怨者所殺聞者快之丘陵蘭陽人自為知縣以至山西布政俱膺旌典孫遇福山人知徽州拯饑恤寃歷江西河南布政省儉節費李齡朝陽人為北畿江西提學諸生皆率服

成化五年五月吏部尚書崔恭以母喪去任以吏部右侍郎尹旻為本部左侍郎改禮部右侍郎葉盛為吏部右侍郎六月以禮部尚書姚夔為吏部尚書初李秉去商輅欲薦夔彭時欲薦王槩而尹旻又欲得之相持既久乃用崔恭至是乃以夔代恭

成化五年十一月吏部文選郎中陳雲員外劉恒主事乙瑄陳道為吏訐其受賂放吏刑部請逮雲等下獄科道官劾吏部尚書姚夔等私昵屬官刑部尚書陸瑜等朋比故縱并掌通政司事侍郎張文質停留吏所奏本二日使雲等得以為計上以雲等既下獄夔等俱置不問刑部以被劾涉嫌乞調別衙門問理改下錦衣衛



鞫之既而都察院擬罪例贖杖還職上命調雲等於南京部屬其告訐吏孫慶等遣為民

成化九年二月吏部尚書姚夔卒夔浙江桐廬人正統間以春秋舉鄉會試皆第一賜進士擢吏科給事中景泰天順間歷南京刑部侍郎進禮部侍郎吏部尚書至是卒年六十夔豪俊慷慨不拘小節論者謂其類唐杜黃裳而未免通餽謝當時蓋已疵之以尹旻為吏部

尚書七月吏部尚書尹旻等言本部議奏天下諸司官有缺每五日內申所司巡按御史兩月一次具奏各司府每三月類上本部而諸司乃有不如期奏報者自今乞下巡按御史并諸司令其一一如前所奏上之違者俱論以法詔從其議

成化十年三月吏部左侍郎葉盛卒盛崑山人正統乙丑進士授兵科給事中己巳之變朝廷多事六科建白多盛與林聰為倡景泰壬申陞山西叅政協贊獨石等處設法創置百廢具興教民耕種多所收穫天順改元擢僉都御史巡撫兩廣成化初巡撫宣府墾田益廣以所積餘糧鬻戰馬千八百匹脩屯堡七百餘所召入為

禮部侍郎卒年五十五賜謚文莊盛留心世務在宣府多所建置但在兩廣不能戢下官軍多馘平人報功又以峒蠻出沒不常禁有司不許擅申盜賊必俟年終彙奏未免姑息觀望識者非之

成化十三年六月尹旻調兵部武選司郎中姚璧為廣西思明府同知璧故尚書夔之子夔素與尹旻不協及璧又忤旻意欲注邊郡恐致物議乃擬徽州近地知內批必不從果得旨璧浙人何得處以近地遂有是命璧居廣西數年以病歸卒于家七月陞耿裕為吏部右

侍郎

成化十五年春正月從太監汪直之請勅加吏部尚書尹旻為太子太保

成化二十二年五月革尹旻太子太保以尚書致仕以其子子龍納賄行私八月陞吏部左侍郎耿裕為吏部尚書十月調吏部尚書耿裕于南京禮部改工部尚書李裕禮部左侍郎徐溥于吏部溥仍兼學士

成化二十三年九月吏部尚書李裕以附李孜省罷十月召前南京兵部尚書致仕王恕為吏部尚

書尋加太子太保先是司禮太監懷恩以直道黜居鳳陽至是召還預政恩素知萬安諛佞王恕剛正力言于上請去萬安而召恕用之遂有是命恕至京鄒智往語之曰三代而下人臣不獲見君所以事事苟且公宜先請見君時政之不善者歷歷陳於上前庶其有濟一受官職再無可見之時矣恕善其言而不能用時南京科道交章保薦恕宜入閣上曰朕用蹇義王直故事委恕吏部若有謀議亦無不聽

成化二十三年十月孝宗

以少詹事楊守陳為吏

部右侍郎

弘治二年三月以張悅為吏部侍郎十月吏部右侍郎楊守陳卒謚文懿守陳浙江鄞縣人性恬淡官五品十有六年泊然自處未嘗求進權幸有重其賢欲援之者使所親喻意守陳謝却之謂其人曰吾猶嫠婦也守節三十年今老矣豈白首而改節耶嘗被命教內豎多為近侍與守陳同事者率因之取寵貴而守陳獨無所資藉嘗言古人謂國可滅史不可滅我太祖定天下即命儒臣撰元史太宗靖內難其後史臣不紀建文君

事遂使建文五年政事及當時忠於所事者皆湮沒不傳及今採輯尚可補國史之缺景皇帝已復位號而英宗實錄標目猶書郕戾王附是宜改正草奏欲上以病不果

弘治六年三月太子太保吏部尚書王恕罷時大學士丘濬亦階太子太保兼禮部尚書一日內宴濬以內閣位恕上恕以已冢宰不宜居禮書下頗有言適太醫院判劉文泰援例求進事下吏部議格不行文泰因憾恕遂訐奏恕變亂選法及不當令人作大司馬王公傳內多詳述留中之疏并封所刻傳進之濬謂恕賣直沽名恕上疏自劾乃下文泰獄降御醫恕求去益力詔允之命乘傳以歸有司歲給役米文泰之奏訐濬陰囑之於是言官交章劾濬媚嫉妨賢乞賜罷黜上不聽改禮部尚書耿裕為吏部尚書加太子太保

弘治六年八月以周經吳寬為吏部左右侍郎

弘治七年四月改南吏部考功郎中儲瓘為吏部考功郎中瓘留意人才考注臧否無不曲當

弘治八年二月吏部尚書耿裕卒謚文恪裕遵其父九

疇之教世守清脩不營產業不治居第儉約蕭然無異寒素表儀縉紳世濟其美

弘治九年二月以屠瀟為吏部尚書

弘治十三年五月屠瀟乞致仕許之加太子太傅

六月召南京兵部尚書倪岳為吏部尚書

七月以王鏊為吏部右侍郎

弘治十四年十月太子少保吏部尚書倪岳卒謚文毅岳在禮部十餘年儀文制度多所擬定在吏部獎恬抑躁不恤恩怨正色盛氣人不敢干以私事當廷議片言裁決天下皆仰其風采以為謙之爭子云

弘治十四年十月改兵部尚書馬文升為吏部尚書

正德元年夏四月吏部尚書馬文升罷先是御用監

太監王瑞以大昏禮奏書篆儒士缺人吏部已奉旨考

選復有旨令革退人役通送本監考校優劣文升方杜

塞倖門堅執不從瑞慚憤奏文升抗拒科道皆上疏力

辨事乃寢文升素與劉大夏不協文升與許進劉宇皆

河南人在先帝時文升嘗薦進提督團營宇總制宣大

大夏見先帝因言宇之過宇幾不免戶部侍郎王儼兵

部侍郎熊繡皆湖廣人儼與大夏姻親繡以廉著文升欲抑儼等引進劉宇會兩廣缺總督都御史文升薦繡往補之繡不樂于外詣吏部辭之不允繡憾之與李東陽謀去文升以大夏代其任至是乃諷同鄉御史何天衢屢疏論之文升遂力求致仕章跡前後至二十一上乃允以吏部左侍郎焦芳為吏部尚書芳河南泌陽人時司禮太監李榮亦河南人為芳內援故李東陽輩之謀不行

十一月調提督團營兵部尚書許進為吏部尚書

十二月吏部侍郎兼學士張元禎卒元禎為江西南昌人以進士庶吉士入翰林歷前職平生論議慷慨立名好脩每與陳選羅倫陳獻章以理學相箴警天下之士皆想望風采晚年以纂脩再出務為貶抑言官詆其營求竟歿于京邸未免齎恨云

正德三年正月罷吏部尚書許進尋除名為民調兵部尚書劉宇為吏部尚書皆劉瑾所為以王瓊為吏部右侍郎四月致仕吏部尚書王恕卒年九十四贈左柱國太師謚端毅恕陝西三原人舉進士授大理評事

憲章類編 卷一  
寺副知揚州歷江西河南布政使巡撫荆襄河南雲南  
進南兵書巡撫南畿復兵書以至冢宰隨在著稱好學  
則至老不倦所著有漕河通志介菴奏議玩易意見石  
渠意見經籍格言等書

正德四年四月降吏部尚書兼學士梁儲為右侍郎劉  
瑾以儲等在弘治中纂脩大明會典壞宗祖制書雜以  
新例悉毀之儲因降為侍郎左庶子毛澄左諭德傅珪  
等皆降職大學士王鏊致仕免究惟李東陽如故

五月以孝宗實錄成復梁儲吏部尚書兼學士

十月以吏部左侍郎張綵為吏部尚書綵陝西人弘治  
中任文選郎中養病歸劉瑾查京官養病久者悉革為  
民綵赴京焦芳薦于瑾復補舊任已而楊一清薦綵諳  
曉韜畧堪任邊方巡撫陞都御史尋陞侍郎劉宇入閣  
遂以綵代之綵嘗勸瑾今天下諸司官有饋送禮物者  
非取于官庫則斂于小民取怨貽患不可瑾納其言遂  
禁察饋遺者適巡按山東御史胡節回斂銀欲行饋送  
瑾偵知之捕下獄死少監李宣侍郎張鸞錦衣指揮趙  
良差往福建回斂銀貳萬兩饋瑾瑾奏收其銀於承運

庫宣等皆降黜其餘因饋送得罪者甚多剝削之弊一時少息綵又嘗言于瑾謂其左右用事者多騙財壞法瑾悉去之其他救正頗多衣冠之禍少減然綵在吏部惟知敬瑾諸宦者以為瑾之疎同類皆綵教之

正德五年八月劉瑾既誅下吏部尚書張綵獄初綵在吏部尊敬瑾故事吏部推用大臣必關白內閣綵以為事在劉瑾內閣不得預每忽之及瑾被繫捕綵下都察院獄病死仍暴其屍家屬流嶺南

九月以傅珪為翰林學士尋陞吏部右侍郎  
十月吏部尚書許進卒贈太子太保謚襄毅

正德六年正月改兵部尚書楊一清為吏部尚書

調南京刑部主事王守仁為吏部驗封主事

十二月以蔣冕為吏部右侍郎

正德七年正月以王守仁為考功郎中前少師吏部尚書馬文升卒年八十五贈太傅謚端肅文升鈞州人性介特不尚華侈立朝五十餘年重名節勵廉隅雖位極人臣退然不敢自居至於值事變臨利害則屹然不可奪云



正德八年正月以南戶部左侍郎儲瓘為吏部左侍郎未赴而卒年五十七瓘先世毘陵人元末徙泰州瓘少貧無資勤苦嗜學舉成化癸卯甲辰鄉會試皆第一狷介清脩與物無競推引名士振起阨窮逆瑾專權時公卿奔走瓘愧憤引疾去既而起用亦遂乞休至是再起卒謚文懿

正德元年十一月加吏部尚書楊一清少傅兼太子太傅給事中王昂以選法不公劾之詔下謫昂一清上章自劾保留昂朝廷不聽謫昂休寧縣丞期月轉應天推官昂不避權貴一清受善納諫天下兩賢之

正德十年四月調兵部尚書陸完為吏部尚書

十二月以王鴻儒為吏部侍郎

正德十四年七月逮吏部尚書陸完下獄藉其家以交通宸濠故

正德十五年十月調兵部尚書王瓊為吏部尚書

正德十六年正月以羅欽順為吏部左侍郎

按吏部尚書領太子太保自詹徽始詹坐藍黨死其登少師自蹇義始馬文升繼之王直則少傅也吏部尚書

一人左右侍郎各一人其屬司務二人文選驗封稽勲  
考功四清吏司文選郎中一人員外郎一人主事二人  
驗封郎中一人員外郎一人主事一人稽勲郎中一人  
員外郎一人主事一人考功郎中一人員外郎一人主  
事二人吏四十五人監生六十七人

文武官品階勲祿

洪武二十五年十一月上以中外文武百官職名沿革  
品秩崇卑勲階陞轉俸祿損益歷年滋久屢有不同無  
以示成憲于後世乃命儒臣重定其品階勲祿之制以  
示天下惟醫學陰陽僧道官俱不給祿

按太師太傅太保宗人令左右宗正左右宗人左右都  
督品正一階初授特進榮祿大夫陞授特進光祿大夫  
勲左柱國右柱國祿月支米八十七石太子太師太子

太傅太子太保都督同知(品)從一(階)初授榮祿大夫陞  
 授光祿大夫(勳)柱國(祿)月支米七十四石太子少師太  
 子少傅太子少保尚書左右都御史(品)正二(階)初授資  
 善大夫陞授資政大夫加授資德大夫(勳)正治上卿都  
 督僉事正番守都指揮使(品)正二(階)初授驃騎將軍陞  
 授金吾將軍加授龍虎將軍(勳)上護軍(祿)以上文武俱  
 月支米六十一石衍聖公真人俱(品)正二無勳祿左右  
 布政使(品)從二(階)初授中奉大夫陞授通奉大夫加授  
 正奉大夫(勳)正治卿都指揮同知(品)從二(階)初授鎮國  
 將軍陞授定國將軍加授奉國將軍(勳)護軍(祿)以上文  
 武俱月支米四十八石太子賓客侍郎副都御史通政  
 使大理卿太常卿詹事府尹按察使(品)正三(階)初授嘉  
 議大夫陞通議大夫加授正議大夫(勳)資治尹副番守  
 都指揮僉事指揮使(品)正三(階)初授昭勇將軍陞授昭  
 毅將軍加授昭武將軍(勳)上輕車都尉(祿)以上文武俱  
 月支米三十五石光祿卿太僕卿行太僕卿苑馬卿參  
 政都轉運鹽使(品)從三(階)初授亞中大夫陞授中大夫  
 加授大中大夫(勳)資治少尹番守指揮同知衛指揮同

陞下脫授字

皇朝典章

卷十六

三

知宣慰使(品從三階)初授懷遠將軍陞授定遠將軍加  
 授遠將軍(勳)輕騎都尉(祿)以上文武俱月支米二十六  
 石宣慰使係土官無祿餘倣此僉都御史通政大理太  
 常太僕少卿少詹事鴻臚卿京府丞按察副使行太僕  
 少卿苑馬少卿知府(品正四階)初授中順大夫陞授中  
 憲大夫加授中議大夫(勳)替治尹指揮僉事宣慰同知  
(品正四階)初授明威將軍陞授宣威將軍加授廣威將  
 軍(勳)上騎都尉(祿)以上文武俱月支米二十四石國子  
 祭酒布政司參議鹽運同知(品從四階)初授朝列大夫  
 陞授朝議大夫加授朝請大夫(勳)替治少尹(祿)月支米  
 二十石宣慰司副使宣撫司宣撫(品從四階)初授宣武  
 將軍陞授顯武將軍加授信武將軍(勳)祿無殿大學士  
 閣坊大學士翰林學士庶子通政司參議大理寺丞尚  
 寶卿光祿少卿部郎中欽天監正太醫院使京府治中  
 宗人府經歷上林苑監正按察僉事府同知王府長史  
(品正五階)初授奉議大夫陞授奉政大夫(勳)脩正庶尹  
 儀衛正正千戶宣慰同知(品正五階)初授武德將軍陞  
 授武節將軍(勳)驍騎尉(祿)以上文武俱月支米十六石

侍讀學士、侍講學士、諭德、洗馬、尚寶、鴻臚、少卿、員外郎、  
 五府經歷、知州、鹽運副使、鹽課提舉、(品從五階)初授奉  
 訓大夫、陞授奉直大夫、(勳)協正、庶尹、衛鎮撫副千戶、儀  
 衛副招討司、招討宣撫司副使、安撫司、安撫、(品從五階)  
 初授武畧將軍、陞授武毅將軍、(勳)飛騎尉、(祿)以上文武  
 俱月支米一十四石、大理寺正、詹事丞、中允、侍讀、侍講、  
 司業、太常寺丞、尚寶司丞、太僕寺行太僕寺丞、主事、太  
 醫院判、都察院經歷、京知縣、府通判、上林苑監副、欽天  
 監副、五官正、兵馬指揮、留守司都司、經歷、斷事、典仗、審  
 理正、(品正六階)初授承直郎、陞授承德郎、(勳)無百戶長  
 官副、招討宣撫僉事、安撫同知、(品正六階)初授昭信校  
 尉、陞授承信校尉、(勳)雲騎尉、(祿)以上文武俱支月米十  
 石、神樂觀提點、僧善世、正一、(品正六)無勳、祿贊善司直  
 郎、備撰、光祿寺丞、署正、鴻臚寺丞、大理寺副、京府推官、  
 布政司經歷、理問、鹽運判官、州同知、鹽課司提舉、市舶  
 河渠副提舉、(品從六階)初授儒承務郎、陞授儒林郎、吏  
 出身、宣德郎、(勳)無祿、月支米八石、都給事中、監察御史、  
 編修、評事、行人司正、五府都察院都事、通政司經歷、太

常博士典簿兵馬副指揮營繕所正京縣丞府推官知  
 縣按察司經歷留守司都司都事副斷事審理副安撫  
 僉事蠻夷長官(品正七)階儒初授承事郎陞授文林郎  
 吏出身宣義郎(勳無祿)月支米七石五斗檢討左右給  
 事中給事中中書舍人行人司副光祿典簿署丞詹事  
 太僕主簿京府經歷靈臺郎祠祭署奉祀州判官布政  
 司都事副理問鹽課司副提舉衛鹽運司宣慰招討司  
 經歷蠻夷副長官(品從七)階初授從仕郎陞授徵仕郎  
(祿)月支米七石國子監丞五經博士行人部照磨通政  
 司知事京縣主簿欽天監主簿保章正御醫協律郎典  
 牧所提領營繕所副大通關寶鈔龍江司提舉衛知事  
 府經歷縣丞鹽同提舉按察知事宣慰都事王府典寶  
 奉祀良醫典膳正紀善講經至靈元符崇真宮靈官(品  
正八)階初授迪功郎陞授脩職郎(祿)月支米六石六斗  
 清紀郎翰林典籍國子助教典簿博士光祿錄事監事  
 鴻臚寺主簿京府運司知事挈壺正祠祭署祀丞布政  
 司照磨王府典膳副奉祀副典寶副良醫副宣慰經歷  
 神樂知觀崇真宮副靈官左右覺義玄義(品從八)階初

授迪功佐郎陞授脩職佐郎祿月支米六石校書侍書  
 國子學正部檢校鴻臚署丞五官監候司曆營繕所丞  
 典牧所會同館文思院承運寶鈔廣運廣積贓罰十字  
 庫顏料皮作鞍轡寶源等局織染所京府織染局各大  
 使龍江寶鈔副提舉府知事縣主簿長史司主簿典儀  
 正典樂牧監正茶馬大使贊禮郎奉饗宣撫安撫司知  
 事品正九階初授將仕郎陞授登仕郎祿月支米五石  
 五斗待詔司諫通事舍人正字詹事府錄事司務學錄  
 典籍鳴贊序班司晨漏刻博士司牧大使牧監副園長  
 太醫院提舉司鹽課司州所吏目軍儲御馬都督府門  
 倉軍器等局大使承運寶鈔廣運廣積贓罰十字庫副  
 使典牧所會同館文思院副使廣盈太倉銀太僕寺京  
 府庫都稅宣課柴炭司大使顏料皮作鞍轡寶源局織  
 染所京府織染副使草場大使孔顏孟子孫教授按察  
 司檢校府宣撫司照磨典儀副教授伴讀都司運司府  
 京衛宣撫慰司學教授司庫司府雜造織染局稅課司  
 大使司獄巡檢茶馬副使正術正科都綱都紀太常司  
 樂教坊韶舞司樂品從九階初授將仕郎陞授登仕佐

郎祿月支米五石孔目掌饌學正教諭訓導兵馬斷事  
長官司吏目司牲司牧副使府檢校典史軍器局柴炭  
司副使 遞運所大使驛丞河泊所閘壩官關大使牧  
監錄事群長提控案牘都督府御馬軍儲門倉副使廣  
盈庫都課都稅稅課司副使茶鹽課司司府州縣衛所  
倉場大使副鹽運司府衛提舉司所州縣庫大使副使  
司府州軍器織染雜造局副使茶運批驗所巾帽針工  
局慶遠裕民司竹副使司庫副使宣德倉司竹鐵冶河  
州遼陽青州府樂安稅課司大使鹽倉稅課鈔紙印鈔  
鑄印抽分竹木惠民局水銀硃砂場局生藥庫長史司  
倉庫大使副使縣雜造局副使典科訓科典術訓術副  
都綱都紀僧正道正僧會道會以上俱未入品階祿月  
支米三石

## 官制

革除建文元年二月更定官制

按建文時改官制陞六部尚書正一品設左右侍中各  
一人位侍郎上諸司去清吏字改戶部為民度支金帛



倉庾四司刑部為詳憲比議職門都官四司罷左右都御史設都御史一人副僉都御史各一人又改都察院為御史府設御史大夫正二品革十三道置察院一定御史二十八人改諸御史為拾遺補缺改通政司為寺通政使為通政卿通政少卿參議寺丞增置左右補缺左右拾遺各一人復大理寺改為司又改卿為大理卿左右寺正都評事寺副副都評事司務都典簿太常寺改卿為太常卿少卿寺丞分左右天壇祠祭署為南郊祠祭署泗州祠祭署為泗濱祠祭署宿州祠祭署為祈豐祠祭署孝陵置鍾山祠祭署及司園所增神樂觀一人光祿寺改卿為光祿卿少卿寺丞如太常陞少卿從四品省署丞二人增監事二人大僕寺改卿為太僕卿增典廐典牧二署騎驎十五群逐生三群分隸二署詹事府增少卿寺丞各一人宿客二人又置資德院設資德一人資善二人其屬贊禮贊書著作郎各二人掌籍典簿各一人國子監陞監丞為堂上官增司業二人省博士學正學錄增助教十七人鴻臚寺改卿為鴻臚卿少卿寺丞如光祿并行人司於鴻臚寺翰林院增學士

承旨一人、學士一人、設文學博士二人、省侍講侍讀學士、置文翰文史二館、文翰館設侍書、改中書舍人為侍書、文史館設脩撰編脩檢討、又改謹身殿為正心殿、設學士一人、罷華蓋文華武英三殿、文淵閣東閣大學士、各設學士一人、待設無定員、文淵閣設典籍一人、六科、罷左右給事中、改中東西南北城兵馬指揮司為五城兵馬司、指揮副指揮為兵馬副兵馬、始署京衛武學教授一人、啓忠等齋各訓導二人、布政司革左右布政使、設布政使一人、堂上官各陞品一級、改提刑按察司為十三肅政按察司、廣東鹽課司為廣東都轉運鹽使司、罷北平山東河南山西陝西五省及江北學校貢士、革五府左右斷事官、五軍斷事司、增親王官賓輔二人、正三品伴讀伴講伴書各一人、長史一人、左右長史各一人、審理正、典膳正、奉祀正、良醫正、典寶正、竝去、正字、審理副等、改為副審理等、郡王賓友二人、正四品教授一人、記室二人、直史一人、左右直史各一人、吏目一人、典印、典祠、典禮、典饌、典樂、五署、典印、典祠、典禮、典饌、典樂、各一人、典儀二人、引禮舍人二人、儀仗司、吏目一人、賓

信三 卷一  
輔三伴賓友教授進對侍坐稱名不稱臣見禮如賓師  
靖難後俱復洪武舊官制惟存大理寺不設斷事官及  
斷事司正統中復設京衛武學

### 久任大臣

按永樂至正統間諸老臣在政地既久且專蹇義為吏  
部尚書夏原吉為戶部尚書皆二十七年黃福尚書兩  
京三十九年而在交南者十有九年胡濙為禮部尚書  
三十二年周忱巡撫江南二十二年以故用人理財禮  
樂征伐諸大政文經武緯各盡其長章程故在後鮮能  
及

憲章類編卷之十六終

憲章類編卷之十七

災異論訂考察

成化四年九月彗星屢見六科給事中魏元等言四方  
 旱澇民困日急盜賊日盛襄荆流民所在劫殺人心搖撼  
 且君者民之父母也子有饑寒疾苦父母必為之寢處  
 不安今陛下作民父母覽民饑之奏不蒙省懼尚循故  
 事付部施行尚書馬昂等允遇奏報視為泛常持尋常  
 活套之言為終身經濟之策是猶子訴饑寒而父母若

不聞彼若棄父母而不顧則何以處之乞罷征稅之務  
發內帑之財遣官賑濟又言朝廷於僧徒過於信待每  
遇降生之辰輒費無限之貲財建無益之齋醮而西番  
劄實巴等又加以法王名號賞賚隆厚出乘穆轎道用  
金吾乞革去法王等號發回本國追回賞賜以賑饑民  
仍勅寺觀不得請建醮脩齋又言天下之財不在官則  
在民今則公私俱困矣蓋由賞賚無節玩好太多或印  
施經識或填寫佛經或為繪畫之像或造寶石之具及  
雲南等處鑛場採辦悉宜停止又言大臣者君之冢子  
而群臣則衆子也若冢子懷姦而衆子效尤為父者恬  
不之治則國家必敗矣今兩京文武大臣多姦貪蒙蔽  
之徒陛下勿謂其位高而不忍遽去勿謂先朝舊臣而  
暫且寬容宜令自陳休致以全大體貪戀不去者令科  
道糾舉而臣等濫居言路無補於時亦望罷歸以戒不  
職十三道御史康永韶等亦以為言上曰所言有理  
所司即擬行之御史胡深等六人言邇者天出彗星  
昭示鑒戒皇上兢惕不寧臣等亦皆憂畏既已畧陳  
愚衷詔議行之竊惟應天以實不以文今日雖云上下

脩省亦徒為虛文而已未得弭災之實伏望皇上總攬  
乾綱凡大賞罰大機務斷自宸衷母令左右竊以市恩  
如兵部左侍郎商輅乃先帝親擢恩幸無比當皇上正  
位青宮邸邸密謀廢立彼以內閣大臣畧無一言正救  
方且自圖富貴徇其邪謀是乃賣國之姦也兵部尚書  
程信頃承朝命督師四川聽囑權豪之子弟多分首級  
以報功禮部尚書姚夔用私滅公貪財黷貨比因度僧  
受銀鉅萬故京師有反賊劉千斤賊官姚萬兩之謠戶  
部尚書馬昂不學無術妨政害民納餽送之女結勢要  
之人四方水旱賑救無方三邊軍餉調度無策凡此數  
人皆足致變乞賜顯黜用答天意上曰如今急切用  
人之際豈宜求備所言不允翌日早朝兵科給事中黃  
旻等三人具疏於御前面進上曰進疏自有舊規旻等  
紊亂朝儀本當治罪姑宥之姚夔程信商輅懇乞休  
致不准馬昂乞致仕許之丁丑昏刻彗星犯七宮  
西等四星壬午昏刻彗星入天市垣命會官廷鞠  
給事中董旻等三人御史胡深等六人先是旻等以彗  
見各上疏請罷商輅姚夔程信輅等不自安各上章求

退夔奏多詆言者於是旻等復言輅等求退之章皆有欲進之意飾非強辯決當罷黜而攻夔尤切上震怒命錦衣衛三法司執旻等廷鞫之會御史林誠又言臣近劾商輅當邸邸易儲之際不能正救今復起用不合人心上曰唐太宗用王珪魏徵朕用商輅有何不可而屢奏擾亦命廷鞫之各問擬贖杖還職十月吏科給事中毛志言邇者京師地震妖星示警御史康永韶等奏稱兩京官員宜從公考覈以消天變奉旨著吏部會同各堂上官考察各堂上官當念陛下克謹天戒以遵常憲却乃朋姦欺蔽虛應故事如戶部郎中邊永以六十有五被黜而年過於永素行不端如蕭繼者尚留工部郎中鍾成以有疾被黜而久病曠職清譽無聞如彭尚者猶在主事陳瑾行人馬桓貪名素著此而可恕人將效尤乞將府部等衙門堂上官曾預考覈者明正其罪以為大臣欺罔之戒詔考察事已處置矣但今後諸司官考滿吏部都察院務嚴加考覈甲寅彗星犯天屏西第一星十一月戊午夜彗滅南京十三道御史楊智等言妖彗示警災異迭至自非君臣恐懼

憲章類編 卷十七  
四  
進君子退小人不足以盡應天之實大臣如南京守備  
成國公朱儀兵部尚書李賓俱以猥瑣之才濫膺根本  
之寄吏部右侍郎章綸從事先朝雖有可取及任吏部  
以來功名大損如以子玄應冒京衛軍餘僥倖薦書欲  
求事君而先欺君刑部右侍郎王恕不顧名節託本部  
郎中黃紱娶已故劉指揮妻文氏為繼室以大臣而偶  
失節之婦工部侍郎范理外似純朴內實姦貪大理寺  
少卿金紳背公營私詳駁失當伏望嚴加黜責庶可以  
答天戒安人心南京兵科給事中朱清等亦以為言命  
禮部右侍郎葉盛刑科都給事中毛弘往按之

成化五年正月南京吏部右侍郎章綸都察院右僉都  
御史高明會各衙門掌印官考察庶官綸明各徇意見  
奏罷官九十六員上曰既會官考察何以掌印官不  
同僉名事有未當宜令侍郎葉盛都給事中毛弘將今  
次考過官再從公體勅應否來聞時盛弘奉勅往南京  
按他事因以命之既而綸又訐奏上亦命盛等併勘  
成化五年二月宥王恕范理金紳章綸等罪初南京科  
道因天變劾恕等上命葉盛毛弘往南京按之俱得



實奏請區處事下刑部尚書陸瑜覆奏章綸縱子冒籍入試事在革前宜行禮部改正王恕不惜名節范理行事欠謹金紳叅駁失當乞宸斷將各官或調用或罷黜逮問上曰王恕范理金紳事亦在革前并宥之

成化五年閏二月禮部侍郎葉盛奏臣與給事中毛弘奉命會勘章綸高明考察不公及南京給事中王讓御史李英等劾綸不公不法事具得其實當會考之時章綸不能對衆執論偏執已見展轉煩瀆高明亦不與章給誠心商確以致積忿猜疑再三訐奏既而奏復之時又不與諸司掌印官僉名同進二人俱宜逮問綸所言欲留考退郎中潘孟時等三人黜見留左府經歷吳宣等十九人但考察已定恐難紛更至於讓等劾綸事亦皆不實俱下吏部議擬以聞議入上是其言章綸高明姑置不問

### 考察官復職

弘治六年春正月詔考察官員未及三載被黜者非有貪暴實跡許復職

憲章類編 卷十七  
六

## 冒濫官賞

成化十九年十二月吏科王瑞等言爵賞者天下之公器自古帝王所以驅策群臣制馭四海者也我祖宗列聖法古為治設官分職各有定員惟有功德才能者授之初無倖取之路今恩典內降廝養賤夫市井童稚皆得以夤緣而進名器之濫一至于此伏覩英廟復辟之初懲景泰間倖用者多率皆黜罷皇上臨御之日察天順初冒功者衆一切革除史冊書為盛事天下傳為美政伏乞斷自宸衷一槩革罷以絕弊端御史張稷等亦上疏言之其畧曰比年以來末流賤技多至公卿屠狗販繒亦居清要有不識一丁而濫授文職有不挾一矢而冒任武官末流之弊不可勝言伏望命內閣大臣同吏兵二部一一審實明正其罪以警其後奏入上曰瑞等所言事朝廷自有處分自今仍有奏擾希求進用者必罪之

憲章類編 卷十七  
二

## 久任

正德十年四月戶科給事中黃重上言邇來法制屢變天下司府州縣官員到任未久往往陞擢其間又因別項事故去住不常夫久於其職賢者可以責其成功不肖者難以掩其罪狀今屢更易雖有高世之才年月未久何由積事程功况舊者去而新者代送舊迎新費出小民緣絕簿書弊生姦吏其害有不可勝言者地方不寧民生不安皆由於此不報按今任板京堂官約一百二十餘京司官約五百方面官約四百進士候選者三年約三百進士為州縣正府佐及舉人官陞京司者約二百三年之間以進士候選者進士為州縣正府佐者舉人官陞京司者共計五百以陞京司五百之缺京司之五百以陞方面之四百及羨餘以補京堂方面之四百合京司羨餘共以陞京堂統共約一千五百員三年之內續益進士三百并舉人陞京司者歲准其益數計合消一百餘員以一千五百人歲得廢黜亡故百餘消息之數亦自然之勢也復慮才湧官無以居之不為久任長便之法或數轉以申情或侈摘以騰缺或添註增設以疏任而士無固志雖欲痛裁奔競不能

給由

弘治三年三月復官員給由例先是成化甲辰令被災所在考滿官員納米預備賑荒免赴部惟造牌冊差人齎繳至是王恕等會題考課之法廢格不行甚非政體今後考滿官俱令給由赴部照例考覈從之

起復

永樂八年二月上親征本雅失里命胡廣楊榮金幼孜扈從時榮喪母特留之

永樂九年六月楊榮奔喪還起復至京

正統十二年二月復于謙兵部右侍郎理部事先是謙丁父喪詔起復屢疏乞終制不允遣行人汪琰諭祭營葬事畢還朝陛見遂復前職留京既而復聞母喪朝廷以邊事方殷仍命起復

景泰四年五月內閣吏部尚書王文以憂去九月起復成化元年二月翰林脩撰陳鑑居憂召脩實錄固請終制許之

成化二年五月李賢奪情起復翰林修撰羅倫疏劾李賢遭父喪宜令終制宋仁宗起復富弼孝宗起復劉珙二臣皆不從綱常倫理所關甚大詔倫狂妄謫福建市舶司副提舉御史陳選等文章留倫不報編脩尹直引文彥博待唐介故事請賢留倫賢曰潞公市恩歸怨朝廷吾則不敢倫雖貶而士歸之

成化三年九月翰林丁憂修撰王獻乞終制許之

成化五年十一月總制兩廣都御史韓雍以憂去上

命兵部議舉代者仍起復韓雍陞右都御史總督兩廣

軍務兼理巡撫

成化六年正月韓雍奏乞終制并辭免右都御史兼總督兩廣軍務之任上曰兩廣用人方急難拘常例守制不允辭

成化七年十一月柯潛以少詹事居憂辭免召命乞終制許之

成化八年四月命詹事兼侍講學士李泰復任泰以伯父司禮太監永昌為父不為所生母終喪士論愧之

成化十九年秋七月前兵部尚書余子俊服闋召為戶

部尚書

起廢

宣德二年五月簡用罷黜庶官

景泰三年二月詔各處見任官員有才行政事優長屈在下僚及有文學才行堪授職任之士隱於民間及官員罷職委無贓犯重情而才學可用者並聽在京四品以上在外巡撫巡按方面并府州縣正官舉薦赴京考用所舉之人後犯贓罪連坐舉主

追復原官

正統三年五月河南叅政孫原貞奏故汜水縣典史曾泉始由進士任御史以事降黜自宣德六年到任廉謹勤能課農勸學官有儲積民無科擾歷任三年家給人足俗醇訟簡然其所以裕民者不過用民力因地利以阜其財厚其生耳聖明在上罷邑率多俊乂然求其如泉者不多得也臣至其邑泉沒已三年民之懷惠至今稱之乞勅該部覈實原其過名追復其官以為天下士

風之勸從之

成化元年二月御史趙啟言張鵬楊瑄等在天順元年為石亨構陷者俱蒙恩例復職即中吳節等為人所累御史葉淇等犯進言之失乞通查復職又言于謙等為石亨等誣陷榜示天下其後亨等不一二年亦皆敗露陳循俞士悅等前後恩宥無俟臣言獨正統十四年虜犯京城賴于謙保固其功不小餘亦可憫伏乞收回前榜死者贈官存者復職上曰朕亦稔聞謙冤所司其悉如御史言之五月復倪謙為翰林學士閑住謙

上言天順二年奉命充順天老試官都御史寇深陰結錦衣指揮逮吳擴撫臣罪除名戍邊今幸遇登極恩釋為民乞置對以雪冤枉上以事在赦前不問復職閑住

成化三年十一月復兵部尚書沈敬官敬嘗被石亨等誣與于謙等迎取外藩謫戍邊至是事白

召謫官

洪武九年六月召岐寧衛經歷熊鼎還京師鼎行次中

途西戎朶兒只班要劫死之。昺撫州臨川人。陳友諒破江西。強之仕。不從。王師駐南昌。召為中書博士。編集經史事類。拜起居注。九郊祀禮樂官。制法律。及賜外夷言詔。昺皆與議。歷陞山東按察司副使。既而為晉王傅。以不能弭元四大王出沒。謫改岐寧。知西戎徂詐。密疏論其雖降且叛之狀。召還被害。上悼惜之。立祠致祭。洪武十九年五月。上諭吏部曰。國家人才非一日所能造就。曩進士魏安仁等六人。嘗以過謫為浙江按察司書吏。使知自新。今已歷年。恐為小人所侮。則終身喪志。雖欲改過。不可得矣。其召還用之。

成化二十年十二月。命陝西耀州判官張善吉為兵科都給事中。善吉初為兵科給事中。調外任。久之不遷。遂以方術托太監高英。轉聞於上。因得召見。遂有是命。士人耻之。

成化二十一年正月。復雲南姚州判官林俊為南刑部員外郎。師宗州知州張黻為南左府經歷。梁方等以星變。謂俊黻禍由已作。恐言者及之。遽乞內降。復其官。

弘治元年三月。南京吏部主事儲瓘上疏薦舉謫籍遺



才先是中書舍人丁璣主事張吉王純進士敖毓元李文祥並以言事遠謫璿言五人者既以直言徇國必不變節辱身今皆棄之嶺海毒霧瘴氣與死為伍情實可憫乞取而寘之風紀論思之地則言論風采必有裨益與其旋求敢諫之士不若先用已試之人 上付吏部起用之

### 大臣致仕給米撥夫給驛歸

成化十三年六月大學士商輅致仕賜給驛歸

成化十五年十月戶部尚書楊鼎再乞休致詔允所請令有司月給米二石人夫四名應用先是大臣致仕未有給米撥夫之例有之實自鼎始 十二月命禮部尚書鄒幹工部尚書王復致仕有司給月米人夫視楊鼎例

弘治十三年五月吏戶禮刑工部尚書屠濬周經徐瓊白昂徐貫各上疏乞致仕許之濬昂並加太子太傅經瓊並加太子太保各歲給人夫賜璽書給驛以歸

京官養疾

成化十三年五月兵部尚書項忠乞歸養疾許之  
正德三年二月養病南祭酒章懋奏乞致仕許之

京官歸省

革除建文元年七月勅令京朝官請告歸省給勘合于  
內府

正統四年三月大學士楊士奇乞歸省墓遣中官阮澹  
護送且促還京師

正統五年二月大學士楊榮乞歸省墓

正統六年二月大學士楊溥乞歸省墓尋還朝

成化二年正月兵部尚書彭時歸省

正德六年四月大學士劉忠省墓還朝

歸養

洪武三年二月上行後苑見巢鵲翼哺之勞禽鳥且  
爾况人母子之恩乎令群臣有親老者許歸養

憲章類編 卷十七  
洪武二十三年十二月國子生程通言其祖父以罪謫居陝西年過七十無他子孫侍養乞放還鄉里俾得就養上憐其志從之

弘治十七年春正月御史陳茂烈以母老陳情乞終養許之茂烈世為福建興化衛總旗少喪父茂烈繼其後厲志邁俗不與群兒伍晝入公署夜歸讀書祖母憐其孱弱亟止之乃韜燈默讀不少輟年十八慨然歎曰善學聖人者莫如顏曾顏之克己曾之日省豈非學之法與乃作省克錄以自考登進士為吉安府推官明允公恕信孚于民考績歸至淮以乏寒具凍幾死所知覆以敝裘始甦及為御史袍服朴素借騎一牝馬身若無官而自任風紀之重彈劾不避權貴乞歸終養躬自治畦妻子服食粗糲人甚不堪而泰然自足日坐斗室究極經書體驗身心隨得隨錄嘗曰儒有向上工夫詩文特土苴耳

正德七年九月漕運戶部左侍郎兼左僉都御史邵寶乞歸省抵家再疏乞終養許之

正德八年八月賜終養御史陳茂烈月米先是吏部以

茂烈養母清苦奏改為晉江教諭俾得資其祿以便養  
茂烈辭至是福建守臣復上其孝行貧苦吏部援侍郎  
潘禮例奏給月米制曰陳茂烈清苦可嘉着有司月給  
米三石以資孝養茂烈仍具疏辭不允

### 進士觀政

洪武十八年三月上以諸進士未更事俾觀政諸司各  
照出身次第資格月給俸米

按進士每科大約三百名分試九卿衙門觀政每衙門  
大約三十餘人堂長司僚與之朝夕而試之事其人端  
衰能不能若燭照而數計之於是會其實以二於天官  
天官籍准以為銓注文學政事風節慈愷隨所成以授  
其任任則必久而不數更是以無不可用之才無不可  
知之人此易簡之道 祖宗朝之所以得人今乃無豫  
以處士而復輕用以棄之士先不幸而嘆其無所遭朝  
廷亦不幸而咎不得士其誰自哉祖宗之法不存也

### 進士初授翰林官

洪武三十年六月以進士韓克忠為翰林修撰王恕焦勝為編修

### 進士選部科官

洪武十八年八月以進士方昇梁德遠等六十七人為六科給事中六部試主事上諭之曰忠良者國之寶奸邪者國之蠹故忠良進則國日治奸邪用則國日亂觀唐太宗用房杜則斗米三錢外戶不閉玄宗用楊李則安史作亂蒙塵播遷亦可鑒矣

成化三十年八月吏部尚書尹旻選觀政進士儲瓘為吏部主事瓘以父老懇求便養改南京吏部尋陞郎中考察南京官執政親戚不職者咸去之

### 進士初選知州

景泰五年五月兵部觀政進士常熟楊集上書于謙救章綸鍾同言姦人黃玠進易儲之說以迎合上意脫章綸鍾同死杖下而公坐享崇高奈清議何謙以書示王文文曰書生不知朝廷法度然有膽氣當進一級處之

遂出集為六安州知州進士選知州始此

三途竝用

正統五年十二月令進士舉人監生吏員官聽諸司保舉

選官給舟車

洪武十年正月上謂中書省臣曰官員聽選之在京者宜早與銓注即令赴任聞久住客邸者日有所費甚至假貸於人昔元之弊政此亦一端其當選官淹滯在京者輒經歲月資用既乏遂流為醫卜使賢者喪其所守實朝廷所以待之者非其道也自今銓選之後以品為差皆與道里費仍令有司給舟車送之著為令

大臣蔭官

洪武二十三年十月以前誠意伯劉基次子仲璟為閣門使

永樂十七年冬十月命故大學士胡廣之子種為翰

林院檢討俾在院進學蓋追念廣也

洪熙元年正月擢解禎期為中書舍人禎期前翰林院學士縉之從子縉坐事下獄籍其家產徙邊至是召還以禎期嘗工書故擢用之

成化四年二月政府軍前衛副千戶于寯為兵部員外郎冕故兵書謙之子以父功蔭武職天順初謙殺寯戍邊遇赦得還至是自陳乞改文職從之

成化五年九月命中書舍人解禎亮復職禎亮故翰林學士縉之子九年考滿時已六十八歲矣例不復用禎亮自言父縉在永樂時擢居內閣頗效忠勤乞仍舊職上特許之

正德五年八月復蔭大學士李東陽楊廷和子為尚寶司丞戶部尚書楊一清子為中書舍人

正德十六年五月世宗蔭前戶部尚書韓文孫為光祿丞

恩蔭官政蹟

成化二年四月擢掌新會縣事廣州府同知陶魯為廣

東按察司僉事魯初以父死事。廕為新會縣丞。陞同知。仍掌縣事。至是都御史韓雍請進魯憲職。專守新會。并肇慶之新興陽江陽春龍水等縣。吏部覆奏從之。

成化二十一年十一月。陞廣東按察副使陶魯為湖廣按察使。魯以父廕授縣丞。歷陞副使。至是九年秩滿。乞改別省。撫按等官各為具奏。乃有是擢。仍奉勅兼管嶺西道。兩廣有警。聽往來撫治。

弘治十年三月。湖廣左布政使兼廣東按察副使撫治兩廣地方陶魯卒。魯廣西鬱林人。景泰初以父成死事。蔭授廣東新會縣丞。年甫弱冠。有膽畧。適廣西徭賊流劫雷廉。高肇勢熾甚。將及新會。魯帥其民築輔城。置堡寨。相聯絡。誓死以守。賊至不能克。遁去。時稱其功。遂陞知縣。進府同知。再擢按察僉事。專治盜賊。九載滿。進副使。嘗平山後賊。置從化縣。平恩平陽江賊。置恩平縣。平新寧白水賊。置新寧縣。復平廣西潯梧荔浦府江田州諸賊。擒斬共數萬計。皆親冒矢石。前後身被數十創。陞按察使。進湖廣左布政使。兼廣東按察副使。並奉勅撫治兩廣。民稱為三廣公云。蔭其子錦衣衛世襲副千戶。



諸司勘合

洪武十五年正月始制諸司勘合

舉富民

洪武八年九月詔舉富民素行端潔達時務者

稅戶人材

宣德元年三月吏部言徵至稅戶人材多有言老疾欲

循例令子姪代者上曰故人言有恒產者有恒心今國家用稅戶人材意亦如此其老疾聽以子姪代但須考驗而後用之

錄元臣

洪武二年正月元學士承旨危素學士張以寧王時編脩雷煥刑部侍郎程儒太常博士孫吾與胡益禮部員外郎曾堅主事王肅等自北平至京詔以新製衣冠賜之尋以素及時為侍講學士以寧為侍讀學士堅為禮

部員外郎儒為刑部侍郎肅為工部主事二月以侍  
讀學士秦裕伯為侍制裕伯大名人先從父仕元都就  
學胄監登第累官至福建行者郎中會世亂棄官寓揚  
州復避地松江之上海時張士誠據姑蘇遣人招之拒  
不納吳元年上命中書檄下松江起之裕伯對使者  
曰受元爵祿三十餘年背之不忠也母喪未終亡哀而  
出不孝也乃上書中書省固辭洪武元年復檄起之稱  
疾不出上乃手書諭之曰海濱之民好鬪裕伯智謀之  
士而居此地苟堅守不起恐有後悔裕伯拜書入朝裕  
伯辨博善為辭說上命為侍讀學士屢以故辭不允授  
以侍制

洪武九年十二月勅送故元官蔡子英歸塞北子英河  
南永寧人元季舉進士為擴廓帖木兒所知薦於元累  
遷顯官王師征定西擴廓帖木兒軍敗子英單騎走關  
中入終南山有司以形求得之械送京師至江濱亡去  
至是陝西人捕得之械過洛陽遇湯和不為禮和怒焚  
其鬚懼之終不屈其妻適過洛陽聞子英至欲與相見  
子英避不肯見至京上命釋之授以官英不受退而

上書曰伏惟皇帝陛下乘時而起提三尺劍削平群雄  
混一四海九夷八蠻莫不賓貢英釜魚漏網假息南山  
曩見獲河南拘送京師垂及渡江復得脫亡七年之久  
動勞有司既違陛下又忤大臣揆之常情雖死罪不足  
以擬英而陛下以萬乘之尊全匹夫之節不降天誅反  
療其疾易以冠裳賜以酒饌授以名爵陛下之量包乎  
天地之外矣英感恩無極非不欲竭犬馬之力以報覆  
載之仁但以名義所在不敢改其初志自惟家本韋布  
遭值亂離操戈行伍智識粗淺過蒙主將知薦仕至七  
命躍馬食肉十有五年愧無尺寸之功以報國士之遇  
及國家板蕩又復失節何面目見天下士所以寧死不  
敢有他志蓋臣之事君猶女之適人一與之醮終身不  
改事君之道一食其祿終身無二昔馮道歷仕五朝司  
馬光曰不正之女中人羞以為室不正之士中君羞以  
為臣偉哉言乎管子曰禮義廉耻國之四維四維不張  
國乃滅亡陛下金城湯池兵極其精噐極其利府庫充  
實米粟紅腐國家之盛古未有也猶以為未足於是興  
學校明人倫褒死節獎忠義蓋謂治天下本莫大於禮

義廉耻也。夫以今天下之廣，人民之衆，既不以英一人而加少，又豈以英一人而加多？授英以官，何益於國？舍英不用，何損於事？陛下創業垂統，正當提挈大經大法，以昭示聖子神孫。功臣賢士，不宜以無禮義廉耻之俘虜，而廁於維新之朝。賢士大夫之列也。英自被獲以來，日夜所思，惟追咎昔之不死，以為今日惟死可以塞責。陛下乃待英以禮，沐英以恩，臣固不敢賣死以示名，然亦不敢全身以苟祿。若察英之愚，全英之志，禁錮海南，以終薤露之命，則雖死於炎瘴，亦感恩極矣。陛下之威加于海內，而奔走四夷，不患不行於匹夫之賤。然英聞仁者不中道而改節，義者不苟生以圖榮，勇者不見幾而不作。故王蠋閉門以自縊，李芾闔門以自屠，彼非惡安逸而樂危亡，顧義之所在，雖湯鑊有所不避也。眇焉之軀，仰止古人，死有餘恨，冒瀆天顏，伏俟鈇鉞，不知所言。上覽奏而益重之，命館於儀曹。忽一夜大哭不止，人問之，故子英曰：思舊主耳。語聞，上知其志不可奪，勅有司送之出塞。

# 錄元臣忠節裔

洪武二十二年十一月擢德州同知陳龔為太僕寺少卿龔故元南臺御史大夫福壽之子始由中書宣使授德州同知至是坐事當戍邊上念其父死節特宥而擢之仍賜以鈔錠

洪武二十五年三月兩浙鹽運使陳龍坐黨事謫居雲南時有言龔嘗為中書省宣使係胡惟庸黨屬召還京法司奏當付獄上曰龔元忠臣福壽之子姑宥之令往雲南西平侯沐英處聽差別勅西平侯善遇之

# 歷事監生

革除建文二年冬十月更定歷事監生選用法凡歷事一件為滿考分三等上者即授官次下者再歷一年復考考上者亦即授官次量材選授下還國子監讀書永樂二十二年九月中軍都督府奏本府歷事監生七人今考所治吏事皆勤慎請如例送吏部循次授官仁宗曰為士豈止習吏事而已吏事末也誠能窮經博古

卷十七  
達於脩己治人之道於吏事何難比士習日下率逐末以圖進取而昧於大經大法故用之往往厲民而辱國自今監生歷事可稱者仍命還監進學俾由科舉進庶幾士皆可用官得其人於是通政司引奏六科辦事監生二十人以滿日例應還監幸逢維新之治願仍就六科辦事以圖報效上進二十人者諭之曰諸生不患無位但當圖所以無忝于位者勿徒懷倖進之心士有才德使人求而用之上也而求用於人下也諸生宜立志國家教育爾等固將用之無自汲汲其歸進學有成朕不汝遺時六科給事中多闕諸生萌僥倖之心上灼知之故有是命

成化四年冬十月吏部尚書李秉等奏近雖兩奉詔旨監生有不能出仕願告回家者與冠帶閑住奈監生中其於恬退者少本部記名聽選者見有八千餘名逐年起送到部者尤多於聽選之數先後積滯賢否混淆其間衰老者銳氣已消庸懦者素志不立一旦授以府州縣官不免漁獵以營家欲有司得人而民受其福難矣茲欲將該選監生考選身言書判四事俱可取者居

優等選用或三事或二事可取者量才授任其俱無可  
取而年貌衰老者依詔書例令冠帶閑住則任用得人  
而選法疏通人才不至於壅滯矣從之

### 雜流位公卿

永樂二年四月命僧錄司左善世道衍為太子少師復  
其姓妣賜名廣孝

永樂十六年三月太子少師妣廣孝卒廣孝蘇州長洲  
人初從釋氏名道衍少與高啓楊孟載為友宋濂蘇伯  
衡輩亦稱其詩文洪武十五年僧宗泐薦住北平慶壽  
寺事上在藩邸甚禮遇之每出師命侍世子居守與  
贊謀策初命為左善世尋賜名廣孝授太子少師至是  
南京來朝得疾卒謚恭靖廣孝嘗著道餘錄詆訕先儒  
為君子所鄙若其論文曰惟韓退之歐陽永叔曾子固  
真儒者之文識者亦有取焉

天順五年八月擢吏部郎中萬祺為太常卿祺江西南  
昌人少遇異人相之曰有仙骨否亦極貴因留一書與  
之乃祿命法也於是研精以上公卿貴人多奇中景泰

間以吏胥辦事吏部衆奇其術授鴻臚序班進主簿及  
召見有言輒驗賜以白金綵幣既而景泰不豫有議召  
襄藩者石亨以問祺祺曰皇帝在宮美事他求刻期復  
辟與全寅筮占及徐有貞迎駕觀象合上既復位召  
見文華殿即日擢驗封主事累進員外郎即中曹欽反  
執王翱李賢時祺在旁欽問之對曰公勿負國家宜以  
死上謝則自求多福又徐謂曰尊翁碑文非李公筆耶  
公當勿忘欽俛首其兄鐸曰萬君言是也王李二人獲  
免事平上聞而壯之召祺賜宴勞陞太常卿

成化四年二月陞掌太常寺事禮部左侍郎李希安為  
尚書希安起樂舞生歷官至侍郎用蔣守約例進尚書  
本朝革中書省立六科分掌國政尚書即前代宰輔而  
乃以雜流為之此景泰之失也一時當事大臣不能執  
正遂致因循識治體者惜之

成化十五年五月特加工部尚書萬祺太子少保先是  
皇太子出閣六卿皆加保傅祺時理易州山廠不與竟  
寅緣得之

成化二十年正月萬祺死祺江西南昌人少為縣學吏



以善星命擢鴻臚序班陞吏部主事天順初贊南城舉  
事陞郎中曹欽作亂以援大學士李賢於難薦陞太常  
卿成化壬辰陞禮部左侍郎丁母憂起復為言官所論  
改工部丙申陞尚書管易州廠柴炭尋加太子少保至  
是卒賜葬祭祺起自胥吏居六卿之列且加宮保之任  
人駭物論一時大臣不能執正科道亦噤不一言人心  
殊為不平但祺為人謙約故得保全云

成化二十二年正月江西人李孜省以符水得幸授太  
常寺丞改上林苑監正尋加禮部侍郎兼通政至工部  
尚書後伏誅

### 吏員事例

洪武十七年二月定吏員資格

洪武三十一年二月定吏員出身事例皆以九年考滿  
出身


### 軍民材藝

洪武三十年四月令軍民有一材一藝者得自陳效用

憲章類編

卷十七

三



憲章類編卷之十七終

文化書

